

■ CONVIVENZA

Ilis sentiments che ventrigls pon chaschunar

DA PIEDER CAMINADA*

Cura che nus giain en muntogna è mia dunna nunbattibla. Ilis emprims pèr meters poss jau anc tegnair pitg, ma lura èsi finì. Ella vegn pli e pli sperta e svanescha adina pli fitg or da mia vista, durant che jau ma mudregel da la muntogna siadora – mingatant ma dumond jau pertge che jau fatsch in-summa quai.

Quai n'era betg adina uschia. Cura che jau era anc pli giuven e fit eri gist viceversa. En muntogna era jau nunbattibel. E perquai preferiva mia dunna da betg pli accompagnar mai. Schizunt sche la via era guliva aveva ella adina pli pauc gust. Ses gust è spert daventà in frust. Ed ella era gritta, gea mintgant odiava ella schizunt mes ventrigls. Pertge fixava ella adina mes ventrigls? Quels n'èn ussa bain betg dal tut trids, ma sch'ins guarda precis ves'ins pitschens indizis dad avainas grossas. Il problem n'era dentant betg co che mes ventrigls vesevan ora, ma bain la circumstanza ch'els na vegnivan – ord vista da mia dunna – mai stanchels. E quai na pudeva ella betg avoir.

Cun ses nov ami è tut sa midà. Jau n'enconusch fin oz betg ses prenum, ma ses num da famiglia è Bosch. Ed el è ferm. Fitg ferm. Dapi che



mia dunna è da viadi cun Bosch, ha ella adina gust. A guliv u da la muntogna si: Bosch è adina cun ella, sustegn ella uschè bain sco pussaivel – e dat ad ella il sentiment d'indipendenza totala. A mes concurrent reussescha pia quai che n'è mai reussi a mai.

Saja sco ch'i saja. Jau hai emprendì spert che jau na poss far nagut cunter Bosch – ed jau sun ma aranschè cun el. Sfurzadamain. Gea, nus ans vesain schizunt fitg savens – dad ir cun mountainbike (sche Vus n'avais anc betg lignà). Jau cun mes mountainbike fitg solid da la marca Canyon Enduro (sic!), mia dunna cun il city bike che ha il sexy num Moustache Lundi ed in cool design franzos. E Bosch – quest motor electric nunstanclentaivel – è natiralmain adina cun nus. El fa uschè buns servetschs che mia dunna n'è betg pli da tegnair. Cura ch'ella fa ir ils pedals aud jau l'emprim mo ina ramur schuschuranta – e lura sva-

nescha ella or da mia egliada. Cun quai poss jau viver, perquai ch'ella spetga pli lunsch siador adina sin mai e conferma adina a moda encuraschanta quant bain en furma che jau saja anc per mia vegliadetgna. Natiralmain ma sent jau onurà – ed ignoresch uschè bain sco pussaivel che jau n'hai nagina schanza cunter ella e Bosch.

Mo ina chaussa na capimta mai sin nossas excursiuns: jau na poss sviluppar nagins sentiments d'odi per ils ventrigls da mia dunna. Per l'ina han els ina bella furma e per l'otra als ves jau adina mo curt. Vus savais gea, en muntogna è mia dunna nunbattibla.

* Pieder Caminada è vice-schefredactor da la «Südostschweiz». El è creschi si a Glion en in ambient per gronda part tudestg e viva oz en la vischnanca rumantscha da Castrisch.

Vocabulari

ventrigl – Wade
 nunbattibel – unschlagbar
 tegnair pitg – mithalten
 sa mudregiar – sich quälen, sich schinden
 grit – wütend
 odiar – hassen
 trid – hässlich, unansehnlich
 avaina grossa – Krampfader
 a guliv – geradeaus
 nunstanclentaivel – unermüde
 encuraschant – aufmunternd
 ramur schuschuranta – surrendes Geräusch
 sentiment d'odi – Hassgefühl

Unterstützt von der
Lia Rumantscha



Lia Rumantscha